

Angajoqqaat inuuniarnermikkut atugarisaat pillugit qitiusumik Iisimasanut Katersuiffimmik pilersitsisoqarsinnaanera pillugu apeqquteqaat aallaavigalugu oqallittoqarnissaanik siunnersuut. Apeqquteqaat aallaavigalugu oqallittoqarnissami kingusinnerusukkut Angajoqqaat Illersuisuannik pilersitsinissamut tunngavissiisoqarnissaa siunertaavoq.

(Inatsisartuni ilaasortaq Jens Napätök', Partii Naleraq)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Apeqquteqaat aallaavigalugu oqallittoqarnissaanik siunnersuummut Naalakkersuisut qujapput.

Angajoqqaat tapersersorneqarnissaat pillugu isummersuutit naleqquttut amerlasuut siunnersuummi erseqqissarneqarput.

Ilaqutariinnik peqqissunik ingerlalluartunillu peqarnissarput Naalakkersuisut sulissutigaa. Inuiaqatigiittut ingerlanitsinni ilaqutariit ingerlalluartut tunngaviliisuupput.

Angajoqqaajussuseq aallaaviatigut angajoqqaat akisussaaffigaat, taamaakkaluartoq angajoqqaat angajoqqaatut pissusilersornissaannik Naalakkersuisut ingerlaavartumik nukittorsaajuarput. Angajoqqaajussutsip patajaallisarneratigut meerarpassuit pitsaanerusemik peroriartornissaat qularnanngitsumik anguneqarsinnaavoq, pingaarnertullu angerlarsimaffiup avataanut inissiisarnerit ikilisarnissaannut iluaqutaasinnaalluni. § 37 naapertorlugu Inatsisartuni ilaasortap Jens Napätök'-p apeqqut nr. 2019-087 aqutugalugu apeqqutaanut akissuteqarnermi, Naalakkersuisut taamaalillutik angajoqqaat tapersersorneqarnissaannut periarfissat suunersut pillugit nassuiaateqarput.

Siunnersuuteqartup oqarneratut, angajoqqaajussuseq suliassarujussuusoq Naalakkersuisut isumaqatigaat. Assersuutigalugu inuup allap inuuneranut akisussaasunngorluni angajoqqaanngorlaatat, angajoqqaajuneramik ilinniarneq unamminartoqarsinnaavoq. Taamatuttaaq angajoqqaat aappasaanik pingajussaanilluunniit meerartaartut suli ilinniagassaqaqaat. Angajoqqaatut misilittagaqarneq pissutigiinnarlugu ilikkagaqaqqissinnaannginnermik imaluunniit arlaannik ikiorneqarnissamik pisariaqartitsinnginnermik isumaqalernissaq mianersuutigissavarput.

Angajoqqaat angajoqqaajuneranni nukittorsarneqarnissaat, meeqqaminnullu angajoqqaajulluarnernissaannik ikiornissaat Naalakkersuisut kissaatigisaraat. Meeqqat Kalaallit Nunaata siunissarai, aallartilluarnissaannillu ikiortariaqarpavut. Taamaammallu meeqqat inuusuttullu sumiginnagaasarnerat akiorniarlugu iliuusissanut pilersaarutissami angajoqqaajuneq immikkut samminiarnearpoq.

Meeqqanut inunnullu innarluutilinnut suliassaqarfinni illersuisoqarpugut. Illersuisut taakku Naalagaaffiit Peqatigiit isumaqatigiissutaat pioreersut tunngavigalugit pilersinneqarput, isumaqatigiissutillu taakku ilaaffiginiarlugit sapinngisarlu malillugu malinniarlugit Kalaallit Nunaata qinersimavaa. Illersuisut atuuttut taamaalillutik isumaqatigiissutaasunut pisinnaatitaaffinnik tunngaveqartunut "qilersorsimapput".

Siumut sammititamik angajoqqaajussutsip patajaallisarnissaanut angajoqqaanut illersuisoq aaqiissutissaqqittuunngitsoq Naalackersuisut isumaqarput. Maannakkut kommunini siunnersortinnissamik periarfissaqarpoq, soorluttaa Naatsorsueqqissaartarfik ilaqutariit inuunermikkut atugarisaannut ilisimasanik katersisoq, matumani sulinngiffeqarnermi ikiorsiissutit ernereernermilu ikiorsiissutit, pisortanit ikiorsiissutit, ineqarnermut tapiissutit allallu ilanngullugit.

Siumut sammititamik angajoqqaajussutsip patajaallisarnissaanut angajoqqaanut illersuisoq aaqiissutissaqqittutut isigineqarnera Naalackersuisut isumaqatiginngilaat.

Naalackersuisut sinnerlugit oqallittoqarluarnissaa kissaatigaara.